

INUIT ATAQATIGIIT INATSIARTUNI



UPA2023/63
10. maj 2023
Eqaluk Høegh

Inuit innarluutillit tapersorneqarnissaannut Inatsisartut Inatsisaata allangortinneqarnernissaa siunertaralugu, Naalakkersuisut Inatsisartut Inatsisaannik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Inatsimmik allangortitsinermi angajoqqaat, angajoqqaatut sinniisut ilaqutariillu namminerisaminnik ikiorseqarnissamut pisinnaatitaanerat §8-mi allassimasunngortinneqassaaq. Inatsisartut Inatsisissaattut siunnersuut kingusinnerpaamik UPA2024-mi saqqummiunneqassaaq.

(Inatsisartunut ilaasortaq Agathe Fontain, Inuit Ataqatigiit)

Oqaaseqaat:

Agathe Fontain, Inuit Ataqatigiit, siunnersuutinnut pingaaruteqartumut qujanaq.

Inuit innarluutillit tapersorneqarnissaannut Inatsisartut inatsisaanni §37-i malillugu - inunnut innarluutilinnut aammalu inunnut innarluutilinnut ilaqutaasunut kommunalbestyrelse siunnersuisarlunilu ilitsersuisussaataavoq.

Siunnersuineq ilitsersuinerluunniit peqqissartilluni oqaloqatigiinnertut pisinnaasoq aalajangersakkap immikkoortuani 1-imi, nr. 1-mi aalajangersarneqarpoq.

Inatsisissatullu siunnersuummi nassuiaatit malillugit *aalajangersakkap immikkoortuani 1-imi, nr. 1* ilaatigut ima paasineqassasoq nassuiarneqarpoq:

'Imm. 1 malillugu peqqissartilluni oqaloqatigiinnernut siunertaavoq innarluuteqalersimanagerup kingunerisaanik misigissutsikkut kingunerlutsitsinerup suliarinissaa..... taamaalilluni inuup innarluutillip qanigisaatalu tapersiissut pisariaqartinneqartoq tigusinnaaniassammassuk. Aalajangersakkammi sullinniarneqartut tassaasinnaapput inuk innarluutilik soorlu aamma taassuma qanigisaasinnaasut, tamatuminnga pissuteqartumik inuunerminni sunnerneqartut.

Inuit innarluutillit ilaqutaasalu siunnersorneqartassasut pisariaqartitaanillu ikiorserneqartassasut inatsimmi taamaasilluni allaqqasutut aqqutissiuunneqaralarpoq, tassuunakkummi nalilerneqarmat aamma

INUIT ATAQATIGIIT INATSIARTUNI



qanigisaasut inunnut innarluutilinnut qanigisatut siunnersorneqarnissaminnik pisariaqartitsisartut.

Siunnersuinerup siunertaraa ilaatigut qanigisaasut innarluutaasoq pillugu pitsaanerusumik ilisimasaqarnerulernissaat anguniarneqassasoq, ilaatigut ilaqutaasoq inummik innarluutilimmik qanimut najuitillugu ulluinnarni ingerlallualernissaa siunertaralugu pisortanit ikorfartorneqarlunilu pisariaqartitaanik aqutissiuunneqarniassammat.

Qulaani oqaatigisagut tunngavigalugit Inuit Ataqatigiinniit inatsit matumani pisarput pillugu isumaqarpugut – namminermi ajornartorsiutip pinaveersaartinniarlugu maleragassanik erseqqissunik "pappilissatigut" tunngavissaqareeralualuta.

Inatsimmi maleruagassanik peqqussutinillu ersarissaasoqarnissaa pisariaqartinneqarsimappat – imaluunniit nassuiarneqareersut suli annerusumik pisussaaffilersorlugillusooq nassuiarneqarnissaa pineqaraluarpat – innuttaasut innarluuteqartut ilaqutaasalu ikiorserneqarnissaannik pisinnaatitaaffeqarnerat qulakkeerneqarnissaa tamakkiisumik anguniarneqartariaqarpoq.

Taamaammatt siunnersuut una ataatsimiitsitaliamut susassaqartumut suliassanngortinneqarnissaa siullertut inassutigarpur, matumani ajornartorsiut pillugu paasissutissat uku qulaajarneqarnissaa siunertaralugu:

1) Siunnersuineq aamma ilitsersuineq pillugu malittarisassanik Naalakkersuisut aalajangersaassasut imm. 3-mi pisussaaffilerneqarput. Taamaammallu naalakkersuisut- tamannarpiaq pillugu malittarisassanik aalajangersaasoqarsimaneriniq ataatsimiitsitaliamut susassaqartumut kaammattorusuppagut itisiliisumik nassuiaateqaqqullugit. Ilanngullugu aamma ajornartorsiut matumani pisarput pillugu Inunnut Innarluutilinnut Sullissivik Nunamut Tamarmut Atuuttoq ilaqutaasut ilanngullugit tapersersorneqartarnissaa qulakkeeqataaffigisussaammassuk- ajornartorsiut pillugu nassuiaateqarnissaa soqutiginarsinnaavoq tusarniaavigissallugit.

2) Tiliup qinikkanut pisortanullu innersuussutaasa allattorsimaffii malillugit ilaattut innersuussutigisimasaat, tassa "*Inuit innarluutillit qanigisaat ikiorneqartassasut tapersersorneqarlutillu, soorlu ilinniartillugit, sulinermi isertitassanik annaasanik taarsiisarnikkut aamma ilaqutaasunut inunnut innarluutilinnut ikiuisunut tapersersuisunullu oqaloqateqartarnissaq*" pillugu – nammineerlutik qanoq taassumunnga tunngatillugu pisortanit iliuseqarfigineqarsimanagera naammannersoq imaluunniit naamik saqqummeeqquneqassapput,

INUIT ATAQATIGIIT INATSIARTUNI



3) Kingullertullu kommuneqarfiit inuit innarluutillit tapersorneqarnissaat inatsisartut inatsisaata malillugu ilaqutaasut pillugit ikiorsiiniartarnertik nammineerlutik qanoq pisussaaffertik pillugu kivitsiniarnermikkut killiffeqarnerat ilanngullugu tusarniaavigineqarnissaa siunnersuutigissuarput.

Taama ataatsimiitsitaliami susassaqtumi siunnersuut suliassanngortinneqarnissaanut atatillugu suliniaqqinnissarput Inuit Ataqatigiinniit takorloorparput - inuk innarluutilik ataqatigiissagaasumik, tamakkiisumillu isiginnittumik, inummut tunngasut tamaasa aamma inuup inuunera mianeralugit, tapersorneqarnissaminut pisinnaatitaaffeqarnerat tamatta pisussaaffileeqatigiinnikkut kivinniartariaqaleratsigu.